



FRidericus filius fuit illustrissimi principis Ioannis Palatini Simmerensis, nepos Ioannis, pronepos Friderici, abnepos Stephani, qui à Ruperto rege & Palatino electore prognatus erat. Hunc prudentissimus pater Ioannes melioribus literis à teneris annis imbui, atque paulatim omnis generis uirtutibus institui curauit. Itaque factum ut pietate & prudentia insignis princeps factus fuerit. Cum autem pater postea ætate grauaretur, Fridericum filium negotijs præfecit, atque eius dexteritate res maximas peregit. hinc factum ut Fridericus adhuc adulescens principibus innotuerit, atque in comitijs magnam sibi authoritatem compararit. Ex illustrissima quoque Marchionum Brandenburgensium familia uxorem duxit, atque

multorum principum amicitiam ea affinitate conciliauit. Postea cum pater anno Christi millesimo quingentesimo quinquagesimo septimo moreretur, ipse ei successit, & suos subditos magna prudentia administrauit. Interea factum ut etiam Otto Heinricus Palatinus elector fato fungere. Itaque cum omnes eius fratres & patruus, ipsiusque Ludouici Barbatii Electoris atque Ruberti regis filij posteritas, ante ipsum uita functi essent, præter omnium opinionem multarum regionum administratio, ipsaque Electoralis dignitas, ad ipsum Fridericum proximum agnatum deuoluta fuit. Itaque anno millesimo quingentesimo quinquagesimo octauo sub autumnus tempus Elector inauguratur, atque magna subditorum gratulatione suscipitur, cum natus esset annos circiter quadraginta quinque.